

გელათის ფრესკა და სამეფო სამოსი

აკაკი წერეთლის სახელმწიფო უნივერსიტეტი

გელათის მონასტერი – შუა საუკუნეების საქართველოს უდიდესი სასულიერო და კულტურული ცენტრი ე. წ. „ახალი ათონი“ და „მეორე იერუსალიმი“ ხელოვნების უამრავ ფასდაუდებელ ძეგლს მოიცავს. მან შთამომავლობას სხვა მრავალ ღირებულებებთან ერთად, ფრესკების სახით დაუტოვა მნიშვნელოვანი ინფორმაცია ქართველ მეფეთა სამოსის შესახებ, რომელიც შუა საუკუნეების კოსტუმებში ძალზე საინტერესო სახეს ქმნის. ამის დამადასტურებელია ჩრდილოეთის კედლის ქვედა რეგისტრის მხატვრობა (XVI ს). სადაც წარმოდგენილი არიან ისტორიული პირები – ბაგრატონთა სამეფო ოჯახის წევრები: დავით აღმაშენებელი, იმერეთის მეფე ბაგრატ III (1510-1565), მისი მეუღლე ელენე, იმერეთის მეფე გიორგი ბაგრატის ძე (1565-1584), მისი მეუღლე რუსუდანი და მათი შვილი ბაგრატი.

როდესაც საქართველოს მეფეთა სამოსზე ვმსჯელობთ, ბუნებრივია, ბიზანტიური საიმპერატორო აღკაზმულობა წარმოგვიდგება, ამ პერიოდში ხომ საქართველოს სამეფო კარი მჭიდროდ დაუკავშირდა

ბიზანტიას, ამიტომ იმდროინდელი სამეფო სამოსი ბიზანტიური ტიპისაა, თავად სამოსის შემადგენელი ნაწილების სახელწოდებებიც – ბისონი, იგივე დიბიტისიონი, დიადიმა – ლორო, მანიაკიონი და სხვა ლათინური ენიდანაა გადმოღებული. ქართველ მეფეთა სამოსი თითქოს არაფრით განსხვავდება ბიზანტიელ მონარქთა ჩაცმულობისგან, მაგრამ, თუ კარგად დავაკვირდებით, ასე არ არის. ქართველ მეფეთა სამოსი ფერთა სისადავით გამოირჩევა. ზომიერად გამოიყენება ოქრო ერთიან ფერადოვან გადაწყვეტაში. ამასთან, როგორც სამეცნიერო ლიტერატურაში აღნიშნულია, უკვე XIII საუკუნიდან ქართველ მეფეთა ბისონი წელში გამოყვანილია, განმასხვავებელია ისიც, რომ ქართული შესამოსელი XV საუკუნემდე გეომეტრიული მოტივებით იმკობა, სწორედ ისე, როგორც გელათში დავით აღმაშენებლის (XVI ს) ფრესკაზეა გამოსახული.

გელათის ფრესკაზე სამეფო ოჯახის ყველა წევრი საზეიმო სამოსითაა გამოსახული. საზეიმო სამოსის შემადგენელი ელემენტებია: დიბიტისიონი, ინტერულა, მანტია,

დიადიმი-ლორო და მანიაკიონი, ამასთან მანტია, დიბიტისიონი, ინტერულა, მოგვები შესამოსელია, ხოლო დიადიმა-ლორო, მანიაკიონი – შესამკობელი [1]. სამეფო სამოსის თითოეულ დეტალს სამღვდელმთავრო შესამოსელის მსგავსად თავისი სიღრმისეული აზრი და სიმბოლიკა აქვს. ასევე განსაზღვრული ღვთიური აზრისა და რელიგიური დატვირთვის მატარებელია ორნამენტული მოტივები, როგორც მცენარეული, ისე გეომეტრიული.

ბისონი პერანგისებური გრძელი სამოსია, (სასულიერო ანაფორის მსგავსი) (ნახ.1.ა). მისი კალთა ერთნაწილიანია. ჩაცმის გაიოლების მიზნით ყელი ღრმად ამოჭრილია, ან შესაძლოა წინ ჩაჭრილია და საკინძით იბნევა, რაც დაფარულია ბრტყლად დაფენილი საყელოს მსგავსი ელემენტით – მანიაკიონით, აქვს გრძელი სახელოები, სახელოს ბოლოს ამშვენებს შეოღვილი ყოშები, ანუ ორნამენტირებული მანუეტები – სამაჯურები, რომლებიც სამეფო და სამღვდელმთავრო შესამოსელის სიმბოლიკაში განასახიერებს მაცხოვრის მიღურსმულ ხელთაგან გადმოღვრილ სისხლს. ორნამენტს წარმოადგენს ოქრომკედით ნაქარგი სტილიზებული ყვავილები და მცენარეები. ბისონის ბოლო ქობამოვლებულია, გვერდებზე გაფორმებულია არშიებით, ზოგ შემთხვევაში ჩაქშეჭრილია.

საზეიმო სამეფო სამოსის აუცილებელ აქსესუარებს წარმოედგენს

შესამკობელ – დეკორატიული ელემენტები: მანიაკიონი იგივე ბეჭმანი, დიადიმა-ლორო (იგივე ლორონი), სამკლავე და გვირგვინი.

დიადიმა-ლორო ქვებითა და მარგალიტებით შემკული ოქროქსოვილი ფარჩის ფართო სახვევია და ორი ნაწილისაგან შედგება. დიადიმის ერთმანეთისაგან განსხვავებული სამი სახეობა არსებობს. გელათის ტაძრის მოხატულობაში სამივე სახეობაა წარმოდგენილი. სამეფო ოჯახის წევრები წარმოდგებილი არიან დიადიმით, რომლის ერთი ნაწილი ბისონზეა ჩამოფენილი, მანიაკიონიდან ეშვება ქობისკენ, მაგრამ არ ერწყმის მას. მეორე ნაწილი – სარტყელი მარცხენა ხელზეა გადაფენილი. დიადიმის ამ ორი შემადგენელი ნაწილის გადაკვეთა წარმოქმნის ჯვარს და ღრმა სიმბოლოური აზრის მატარებელია: მისი ვერტიკალური ნაწილი სიმბოლოა იმ სუდარისა, რომელშიც გაახვიეს ქრისტე ჯვარცმის შემდეგ, ხოლო დიადიმის მეორე, ხელზე გადაფენილი ჰორიზონტალური ნაწილი განასახიერებს უფლის აღდგომას და გამარჯვებას სიკვდილზე.

განსხვავებული დიადიმითაა გამოსახული გელათის მონასტრის ერთ-ერთ ფრესკაზე დედოფალი ელენე. აქ დიადიმის მთლიანობა დარღვეულია, ის ორი ცალკეული დეტალისაგან შედგება (ნახ. 1. დ), ესენია მანიაკიონი და თორაკიონი. თორაკია არის ფარისებული ფორმის ნაწილი, რომელიც დიადიმის მსგავსად მორთულია ძვირფასი

თვლებით. ის ბისონზე წელს ქვე-
მოთ მაგრდება. ცხადია, დიადიმის
ასეთი განსხვავებული ფორმა
გარკვეული რელიგიური სიმბო-
ლიკის მატარებელია.

მესამე სახეობა დიადიმისა გე-
ლათის მოხატულობაში მხოლოდ
ბიბლიური პერსონაჟებისა და სა-
სულიერო პირების შესამოსელშია
წარმოდგენილი. მისი ერთი ნაწი-
ლი თავისებური წესით ეხვევა ტან-
ზე – მარჯვნიდან მარცხნისაკენ,
გულზე გადაჯვარედინებულია
და ძირს ეშვება, მეორე ნაწილი
გვერდიდან მოემართება და მარ-
ცხენა ხელზეა გადაფენილი.

დიადიმი-ლორო, მანიაკი, თო-
რაკიონი ფარჩის, ოქროქსოვილია
და შემკულია მარგალიტებითა და
სხვადასხვა ფერის ძვირფასი ქვე-
ბით, მარცხენა ხელზე გადაფენილი
დიადიმის სარტყლიდან მოჩანს
მისი სარჩული, რომელიც სხვა-
დასხვა ისტორიული პირებისათ-
ვის ერთმანეთისაგან განსხვავებუ-
ლი ფერისაა და ეს განსხვავებუ-
ლი ფერი მეფის ადამიანურ, მიწიერ,
ამქვეყნიურ არსებობას აღნიშნავს.
საერთოდ მეფეთა სამოსი გააწყვე-
ტილია ორი ძირითადი ფერის შე-
ხამებით, რომელთაგან ერთი აუცი-
ლებლად ოქროსფერია, მეორე კი
ერთ-ერთი ფერებიდან - მეწამული,
ბაცი მწვანე, მელნისფერი, მოწეუ-
ლი, ლურჯი. ოქრო ღვთითგაბ-
რწყინებულის, არამიწიერის აღ-
მნიშვნელია. საინტერესოა ოქროს
სემანტიკა: მიქაელ მოდრეკილის
ჰიმნში „ოქრო“ გვხვდება „უქრო-
ბის“ სინონიმად, რაც იმაზე მეტყვე-


ლებს, რომ ქართულ ენაში „ოქროს“
ცნებაში იმთავითვე ჩადებული იყო
მისი უქრობელობა. დანარჩენ ფერ-
თა სიმბოლიკა ტრადიციულია:
მწვანე – სიცოცხლის, მარადიულო-
ბის, მეწამული, მოწეული, შინ-
დისფერი – სისხლის, მაცხოვრის
მოწამეობის, ყავისფერი – ამქვეყნი-
ურობისა და მიწიერის აღმნიშვნე-
ლი ფერია. გელათის ფრესკაზე ფი-
გურიერებს ვაზის ლერწების წწუ-
ლითა და გულისებრ ფორმაში
ყურძნის მტევნებით მოხატული
ბისონი, რაც საერო და სასულიერო
იერარქიის იერსახის აღმნიშვნე-
ლია და ღრმა საღვთისმეტყველო
შინაარსი გააჩნია. ეს ნიშნავს, რომ
„მეფე ერის ცხოვრების წარმმარ-
თველი და ღვთის ნების აღმსრუ-
ლებელია. გული, როგორც ადამიან-
ის სხეულის ნაწილი, განასახიე-
რებს ცენტრს, შუაგულს. გული
არის მიმღები და გამტარი ღვთის
ნებისა, მადლისა და სიტყვისა... მე-
ფეთა გულის ზრახვა, გულისწადი-
ლი, გულისყური და გულისცნობა
ღვთითსავსეობას უნდა აცხადებ-
დეს, როგორც ბარძიმი არის აღვსი-
ლი წყლით და მისგან გადმომდინა-
რეწყალი კურნავს სნეულთ“ [2].

მეფეთა და დიდგვაროვანთა სა-
მოსის ერთ-ერთი შემადგენელი ნა-
წილია მოსასხამი ე.წ. „მანტია“ ანუ
პორფირი. პორფირისა და დიდი-
მი-ლოროს ერთდოულად ტარება
მიღებული არ იყო, არ შეიძლებოდა
დიადიმა-ლორო პორფირით დაფა-
რულიყო. პორფირი უკან გადაგდე-
ბული და ყელთან (წინ ან მარჯვენა

მხარეს) საკინძით შეკრული მოსასხამია (ნახ. 1. ე).

პორფირმა სახელწოდება მიიღო უძველესი დროიდან ცნობილი საღებავების სახელიდან – პურპური, რაც ქართულად მეწამულს აღნიშნავს. საღებავს ღებულობდნენ მოლუსკი - პურპურას (purpura) წვენი-

დან. ის იძლეოდა შეფერილობის მთელ გამას – მუქი იისფერიდან წითელსა და ყავისფრამდე. მეწამული ფერის მოსასხამი ძველთაგანვე უმაღლესი ტიტულისა და მდგომარეობის სიმბოლოდ ითვლებოდა.



ნახ. 1. სამეფო სამოსის ნაწილები: ა — ბისონი; ბ, გ, დ — დიადიმები; ე — პორფირი

სამეფო სამოსის აუცილებელი ელემენტია გვირგვინი, ის სამეფო რეგალიადაც ითვლება და უდიდესი სიმბოლური დატვირთვა აქვს. „გვირგვინი ჯვარის სახეს ქმნის, ჯვარ-შემოსილად წარმოდგება. მეფე ღვთისგან არის დადგენილი, ღვთის ხატია ამქვეყნად და მისი გვირგვინი უხილავად ღმრთის ხელს უპყრია. მეფის „შარავანდქვეშ ღვთის ნება სუფევს“. ამის მანიშნებელია ფრესკაზე გამოსახული მაკურთხებელი ხელი მარჯვენა ზედა კუთხეში. „ეს უფლის ხელია, რომელიც აკურთხებს მეფეს და უხილავად მუდამ მოუმართავს ხელს ყოველგვარ ღვაწლში. ამ ღვთივსულიერ საზრისს გულისხმობს მეფის გვირგვინიდან ჩამოფენილი მარგალიტთა სხმული, რომელიც მხრებს სწვდება. იგი განასახიერებს გვირ-

გვინისა (წრის) და ოთხი მხარის (ოთხთა კიდეთა) მთლიანობას, ანუ ღვთის ნებისა და მადლის მოფენას მეფის გვირგვინიდან ოთხსავე მხარეს (სრული მეუფება). ეს არის სიმბოლიკა გვირგვინზე გადმოღვრილი ღვთიური მადლისა“.

ამრიგად, გელათის მონასტრის ფრესკაზე წარმოდგენილი ქართველ მეფეთა სამოსი მდიდარია როგორც მხატვრული, ისე ინფორმაციული თვალსაზრისით და გამოირჩევა რელიგიური დატვირთვის სიღრმისეული აზრითა და სიმბოლიკით, რაც ნათლად ჩანს როგორც სამოსის ელემენტების ორნამენტულ მოტივებში, ისე მის მდიდარ ფერთა გამაში. სწორედ ამიტომ ის დღესაც კი სხვადასხვა დარგის სპეციალისტთა კვლევის საგანს წარმოადგენს.

ირინა უგრეხელიძე
ნინო დოლიძე
ლია ლურსმანაშვილი

გელათის ფრესკა და სამეფო სამოსი

სტატიაში მოცემულია გელათის მონასტრის ფრესკაზე გამოსახული შუა საუკუნეების სამეფო სამოსის ფორმისა და სიმბოლური დატვირთვის ანალიზი. განხილულია სამოსის შემადგენელი ნაწილები (ბისონი, პორფირი-მანტია) და აუცილებელი აქსესუარები – დეკორატიული ელემენტები (დიადიმი-ლორო, მანიაკი, სამკლავე, გვირგვინი); წარმოდგენილია მათი გარეგნული სახის აღწერილობა და ესკიზები.

I. UGREKHELIDZE
N. DOLIDZE
L. LURSMANASHVILI

GELATI FRESCO AND ROYAL ATTIRE

Akaki Tsereteli State University

Summary

The article analyzes the form and symbolic meaning of the medieval royal attire depicted in the fresco of the Gelati Monastery. The components of the clothing (tunic-dalmatic, porphyry mantle) and the necessary accessories – decorative elements (loros, necklace „maniac“, armband, crown) are discussed; A description of the appearance and their sketches are presented.

გამოყენებული ლიტერატურა:

1. ჩოფიკაშვილი ნ. საუკუნეების ქართული სამეფო სამოსელი. სახელმწიფო მუზეუმის მოამბე ტ. XXIII- B. 1962.
2. „ხელმწიფის კარის გარიგება – შესამოსელი მეფეთა“ ქართული მწერლობა თბ. 1983.
3. უგრეხელიძე ი. კოსტუმი შუა საუკუნეების საქართველოში. ქუთაისი: აწსუ გამომცემლობა და სტამბა, 2013.